

Promer Ministro Eman ta splica

Ehecucion Status Aparte ta un paquete total

Decision futuro estatal di Aruba no mester depende di factor placa

ORANJESTAD(AAN)--

E tarea di e promer Gobierno cu a dirigi Aruba den Status Aparte ta abarca tur tereno. Ehecucion di Status Aparte ta un pakete total, cu mester haya atencion pa asina despues, ora Pueblo mester dicidi encuanto fecha di independencia, e no worde dirigi pa e factor placa y dependencia. Promer Ministro Mr. Henny Eman, a splica con e ehecucion di Status Aparte mester worde mira tambe den luz di su bishita mas reciente na Hulanda y Merca.

Enfaticamente Promer Ministro Eman a muestra cu Status Aparte no ta cubri solamente tereno estatal. E ta existi tambe cu diferente otro aspecto ta haya atencion y asina mester percura pa tur organo, cu ta importante pa e funcionamiento di democracia y derechonan fundamental clasico y social, keda institui. Den e cuadro aki mester menciona por ehemplo Parlamento, Justicia, Procurdor General, Raad van Advies, Algemene Rekenkamer, SER, cu mester percura pa un pais, manera mester ta.

Mientras atencion a worde dedica na e rescate economico di e pais, otro aspectonan ta hopi importante den e ehecucion di Status Aparte, manera Promer Ministro Eman a indica.

Habri caminda pa Arubiano por regresa

Un asunto cu a haya atencion y cu tabata uno di urgencia, tabata e aspecto di empleo. Mester a percura pa e habitantenan di Aruba por a conta cu empleo na nivel. Pero banda di esaki, mester a trata tambe di atrae e Arubianonan, cu a haya nan mes ta busca trabao den exterior, manera na Hulanda,

Na momento cu Aruba mester dicidi si ta mantene 1996 pa Independencia, e no mester depende di e asistencia financiero di Hulanda. Ta e tarea di e promer Gobierno di Aruba den su Status Aparte pa percura pa un pakete total worde ehecuta, segun Prome Ministro Eman.

den pasado.

Mester crea e ambiente pa nan por reuni na Aruba cu nan familia. Un di e pasonan cu a worde tuma ta, e registro di Arubianonan na Hulanda. Promer Ministro Eman a indica, cu den e cuadro aki a haci mescos cu a haci na Aruba, ora a registra esnan sin trabao.

Atravez di e registro aki, ta habri caminda pa nan por regresa Aruba y participa na programanan di capacitacion y asina bolbe traha na Aruba.

Garantia pa seguridad di ciudadania

Un aspecto, cu ta sumamente importante pa desaroyo di un pais, ta seguridad. Promer Ministro Eman a muestra con tur hende a keda geshock ora un avion a trece armanan moderno for di exterior. El a muestra cu como pais chikito, Aruba ta keda vulnerable pa loke por drenta na diferente forma.

E promer Gobierno, cu Aruba a conoce despues di su Status Aparte, mester percura pa introduccion di un sistema, cu ta haci cu tur ciudadano ta sinti nan mes libre di amenaza di exterior. Mester haci tur loke ta necesario pa ciudadania sinti su mes sigur.

E asunto aki a worde acerca na forma racional, mescos cu a socede cu economia, manera Promer Ministro

Eman a splica. El a papia

tambe di e cooperacion necesario cu paisnan manera merca, Hulanda, Antillas, Venezuela y Colombia y di e sistema cu mester worde introduci cu ayudo di principalmente Merca y Hulanda pa por combati droga.

Esfuerzonan comun, cu mester conoce envolvimento di tur autoridad responsable, manera e Ministro di Justicia, bao kende Polis ta resorta y Ministro di Finanzas, cu ta responsable pa asuntonan di Douane.

Un idioma internacional contra droga

Ariba nivel gubernamental e base a worde poni pa sigui traha ariba e garantianan necesario pa seguridad di ciudadania. Awor mester traha ariba e ehecucion administrativo. Segun Promer Ministro Eman, a yega na palabracion cu e Promer Ministro di Hulanda, Lubbers, pa asina Aruba y Hulanda por transmiti ariba mes frecuencia ora ta trata tambe asuntonan cu tin di haci cu seguridad, cu ta determinante pa funcionamiento di e pais.

Mester di cooperacion, segun un sistema moderno, y mester yega na cooperacion den uso di e boto di patrulla, y e forma cu mester equipe y utilice. Tambe mester coopera den introduccion di e cacho cu lo worde usa pa Douane y Polis den e intencionan pa combati droga.

Entrenamento lo bira im-

portante y mester tuma lugar a base comun pa asina asegura cu tur ta papia mes idioma. Promer Ministro Eman a muestra cu ningun pais ta atende droga su so y cu pesey mester busca cooperacion y percura pa e programa cu ta worde desaroya, no tin aspectonan negativo.

Kibra dependencia financiero

Status Aparte kier meen cu Aruba a bira un pais ariba su mes. E aspecto financiero ta uno importante, manera Promer Ministro Eman a remarca.

El a muestra con te awor, Aruba tabata depende pa gran parti financieramente di Hulanda. Pero un pais cu ta ariba su mes, mester tin e medionan propio pa para ariba su pianan y mester percura pa e mes tin entrada ariba mercado di capital.

Di parti di e Ministro di Finanzas di Hulanda a haya e sosten necesario pa e momento cu Aruba ta pone su promer pasonan ariba tereno financiero. Sosten completo, manera Promer Ministro Eman ta bisa, enfatisando cu esaki ta importante tambe en vista di futuro ora Aruba mester escoge si ta mantene 1996 como aña pa introduci independencia o ta keda un tempo mas largo cu Hulanda.

Gobierno tin e responsabilidad pa percura cu e dependencia financiero di Hulanda no hunga papel determinante. Cu otro palabra, dependencia financiero di Hulanda, no mester dicidi pa futuro estatal di Aruba, cu no mester worde dirigi pa placa, pero pa aspectonan general y amplio. Promer Ministro Eman a muestra cu na momento di escoge pa futuro, no mester ta asina, cu pasobra ta haya

placa di Hulanda, ta dicidi di keda cu Hulanda.

Pesey e ta di opinion, cu un tarea importante di Gobierno ta keda, pa haci cu Aruba no ta depende di ayudo pa desaroyo di Hulanda.

Aruba enfrente mundo

Ehecucion di Status Aparte mester encera creacion di relacionnan cu exterior pa asina por profila e interesnan como pais.

Promer Ministro Eman a reitera cu tin cierto paisnan importante pa Aruba, manera Japon, Canada, Alemania Occidental, Brasil, Merca. Na e Embahadanan Hulandes na e paisnan aki mester tin un persona presente cu por atende asuntonan pa Aruba directamente.

Reino Hulandes a bay di acuerdo pa apunta na e Embahadanan un persona cu ta bay keda directamente encarga cu tur loke tin di haci cu Aruba. Lo escoge e persona aki for di esnan cu ya ta traha na embahada.

Promer Ministro Eman a splica cu si resulta cu e servicicionan cu ta worde brinda no ta suficiente, mester dicidi pa ampliacion. Na e momentonan aki Aruba tin Arubiano cu por bay ocupa puestonan na Embahadanan den exterior, pero nan presencia na Aruba tambe ta hopi importante. Mester di tur forza na Aruba pa alcanza e obhetivo deseado. Despues ora tin mas hende prepara, e ora Aruba mes por bay nombra Arubianonan den e puestonan aki.



CUMPRO

LOTTO

Y.. GANA

20000

CU F. 3,00 SO!!

OF MAS